

Script of Evening Gojri News Bulletin 18 November 2024 at 1700 Hrs

ایوننگ گو جری نیوز بلیٹن مو رخہ 18 نومبر 2024

یوہ آکا شوانی جموں بے ظفر اقبال تے عبدالرحمن شاہین تیں خبر سنو۔ پہلاں خاص خاص خبر۔

- * 1. جی ٹوانٹی سربراہ کا نفرنس اج تیں برازیل مانہ شروع ہو رہی ہے۔ وزیر اعظم نریندر مودی اس کا نفرنس غے دوران بکھ بکھ عالمی معاملات با رے بھارت غا رویہ تے نوی دہلی لیڈراں غا اعلانیہ غو موقف پیش کریں گا۔
- * 2. نوجواناں با رے قومی میلو 2025 آتے سال غی جنوری مانہ وکست بھارت نوجواناں با رے مذاکرات کا طور ور منایو جائے گا۔
- * 3. آیو شمان پی ایم جے اے وائی سکیم غے تحت آیوشمان وے وندنا غو اندراج 3 ہفتہ غے اندر 10 لکھ تک پُچ گئیو ہے۔
- * 4. تے جواہر نل جہیڑو جے دبائیاں توں وادی کشمیر گو اکلوتو رستو منیو جائے جس غی لمبائی 2.5 کلو میٹر ہے اُس غی مرمت غو کم مکمل ہون غے نیڑے ہے۔

خبران غی تفصیل نال پہلاں عبدالرحمن شاہین۔

G 20 Summit

انیسویں جی 20 سربراہ کا نفرنس اج برازیل غا شہر ریو ڈی جنیرو مانہ شروع ہون جاری ہے۔ ممبر ملکاں غا سربراہان تے بین القوامی تنظیمیں غا نمائندہ اس سربراہ کانفرنس غا بکھ بکھ اجلاس مانہ شرکت کریں گا تے اس سال غا اعلانیہ غا ترجیحی معاملات ور تبادلہ خیال کریں گا۔ آکاشوانی غا نامہ نگار نے دسیو ہے جے بھارت غا وزیر اعظم جناب نریندر مودی کُجھ گھنٹہ پہلاں ریو شہر پُچ گیا ہیں۔ جت برازیل مانہ بس رہی بھارتیہ برادری نے اُن غو پُر جوش سواگت کیو ہے۔ واضح رہ جے برازیل مانہ بسن آلا بھارت غا لوکاں غی تعداد بڑی کھٹ صرف 4 ہزار تیں ساڈہ 4 ہزار ہے۔ مگر اُت وزیر اعظم غو خیر مقدم کرتاواں اُن لوکاں مانہ کافی گرم جوشی دیکھی گئی ہے۔ اج تیں شروع ہو رہی اس 19 ویں جی 20 سربراہ کا نفرنس مانہ وزیر اعظم شرکت کر رہیا ہیں۔ اس سال غی جی 20 سربراہ کا نفرنس غو موضوع ہے ”اک منصفانہ دُنیا غی تعمیر اور اک پائیدار قراہ ارض“ اس کا نفرنس غا پہلا روز غا افتتاحی اجلاس مانہ عالمی لیڈر پُکھ تے غریبی بارے عالمی اتہاد ور غور کریں گا۔ بعد غا اجلاس غے دوران عالمی انتظامی اداراں کا بدلاؤ جیسا حساس معاملات وی زیر بحث آوینگا۔ وزیر اعظم جناب نریندر مودی متوقع طور افتتاحی اجلاس غے دوران بولیں گا۔ اس جی ٹوانٹی سربراہ کانفرنس غے اک پاسے متوقع طور عالمی لیڈراں بشکار دو طرفہ گل بات وی ویں گی۔

Brazil Ambassador Interview

برازیل مانہ بھارتی سفیر سُریش کے ریڈی نے اس گل ور زور دیتاں واکھو ہے جے بھارت باقی ملکاں غے سنگ مل غے جنوبی ملکاں غا تحفظ تے مفادات واسطے علاقہ مانہ اک لیڈر غا طور ور اُبھر غے کم کرے۔ آکاشوانی سنگ اک انٹرویو غے دوران جناب

ریڈی نے وزیر اعظم نریندر مو دی غا برازیل مانہہ جی 20 غا دورہ با رے گل کرتاں واں کہیو جے برازیل تے جنوبی افریقہ غے ہمراہ بھارت جی 20 غو ممبر ہون غے نا طے سانجا طور رور کاروانی کر غے اس نانہہ خوش اسلوبی سنگ نمیڑو کرن غو حامی ہے۔ اپنا انٹرویو غے دوران جناب ریڈی نے جی 20 غا اجلاس با رے گل کرتاں واں کہیو جے اس اجلاس نے بھارت برازیل غا رشتاں نانہہ مزید ڈونگو کیو ہے۔ انہاں نے مزید کہیو جے دوہاں ملکاں نے رل غے عالمی سطح غا مسائل نانہہ وی سلجھان غی بھرپور کوشش کی ہے۔

Young Leaders Dialogue

نوجواناں با رے قومی میلو سال 2025 آتے سال غی 11 تے 12 جنوری نانہہ وکست بھارت نوجواناں با رے مذاکرات غا طور رور مانیو جا نے گو۔ کھیل کود تے نوجواناں با رے امور غا مرکزی وزیر ڈاکٹر مانسکھ مانڈویا نے اس گل غو اعلان اج اک پریس کانفرنس کرتاں واں نوی دہلی مانہہ کیو۔ اپنا خطاب مانہہ جناب مانڈویا نے کہیو جے اس پلیٹ فارم غے ذریعے نوجواناں نانہہ اس گل غو موقع لبے گو جے وے وزیر اعظم مودی غے سنگ اپنا نظریات تے خیالات سانجا کرسکیں گا۔ مرکزی وزیر نے مزید کہیو جے اس طرح غا نوجواناں سنگ مذاکرات کرن غو اک مقصد یوہ وی ہے جے ملک پھر غا نوجواناں نانہہ اک ایسو موقعو فراہم کیو جا نے جت وے اپنا نظریات تے بئر غی پشان کر غے وکست بھارت غا خواب نانہہ پورو کرن مانہہ اپنو تعاون پیش کریں۔ وزیر موصوف نے مزید کہیو جے اس پلیٹ فارم غے ذریعے نوجوان قومی تے عالمی سطح غی بڑی شخصیات سنگ گل بات کر سکیں گا۔

SMVD Reway

آتے سال ماتا ویشنو دیوی غی یا ترا کرنو بڑو آسان ہو جائے گو کیونجے اس یا ترا غو 14 کلو میٹر پیدل سفر آتے سال مانہہ روپ وے غی مدد سنگ صرف 6 منٹ مانہہ طے ہو جائے گو۔ شرانین بورڈ نے روپ وے غو اک ایسو پروجیکٹ تیار کیو ہے جس مانہہ تارا کوٹ توں سانجی چھت تک معزور افراد تے بزرگ افراد جھیڑا جے پریشانیاں گو سامنو کر رہیا تھا اس پروجیکٹ غے ذریعے ان نانہہ شری ماتا ویشنو دیوی دربار مانہہ حاضری دین مانہہ آسانی وے گی۔ قابل ذکر ہے جے ماتا ویشنو دیوی غی یا ترا نا صرف بھارت مانہہ بلکہ پوری دنیا مانہہ مشہور ہے۔ تے اس طرح ات ملک پھر توں علاوہ بیرون ملک تیں وی یا تری آ غے حاضری دیں۔ اس سلسلہ مانہہ شری ماتا ویشنو دیوی شرانین بورڈ غا چیف ایکزکیٹو افسر انشول گرگ نے اس طرح کہیو۔ بانٹ۔۔۔

Terrorist Arrest

جنوبی کشمیر غا ضلع پلوامہ غا ترال علاقہ مانہہ حفاظتی دستاں غی طرفوں اک دہشت گرد نانہہ گرفتار کیو گیو ہے۔ جس غا قبضہ تیں گولہ بارود وی ضبط کیو گیو ہے۔ ذرائع غے مطابق اس دہشت گرد نانہہ اج ہتھیاراں تے گولی سیکہ سمیت پکڑیو گیو ہے۔ اک اعلیٰ پولیس افسر غو کہنو ہے جے آونتی پورا پولیس، 42 راشٹریہ رائفلز تے سی آر پی ایف غی 180 ویں بٹالین غی طرفوں اک سانجا آپریشن غے دوران ترال علاقہ مانہہ ممنوعہ دہشت گرد تنظیم لشکر طیبہ سنگ منسلک اس دہشت گرد نانہہ گرفتار کیو گیو ہے۔ جس غی پشان ارشاد احمد چوپان غے طور ہوئی جھیڑو کہ لڑگام ترال غو رہن آلو ہے۔

یوہ دہشت گرد پنگلش گراں گا باغات وچوں پکڑیو گیو ہے۔ جس غا قبضہ تیں اک پستول، 2 میزین، 18 راؤنڈ تے کُجھ مجرمانہ مواد برآمد کیو گیو ہے۔ عہدیداراں غو کہنو ہے جے ابتدائی تحقیقات تیں ایسو لگے جے گرفتار کیو گیو یوہ شخص پورا جنوبی کشمیر علاقہ ماتہ بہت ساری دہشت گردانہ کا روائیاں ماتہ ملوث ہے۔

Hideout Busted

حفاظتی دستاں نے اج جنوبی کشمیر غا ضلع شوپیان ماتہ دہشت گرداں غی اک کمین گاہ غو پتو لا غے اُس ماتہ تباہ کر دتو ہے۔ پولیس ذرائع غے مطابق یاہ کمین گاہ ٹی آر ایف غی ہو سکے جہیڑی جے لشکر طیبہ تنظیم سنگ منسلک ہے۔ اس کمین گاہ غو پتو لگن توں بعد اس ماتہ بھارتی فوج، سی آر پی ایف تے جموں کشمیر پولیس نے سانجا کاروائی کرتاں واں تباہ کر دتو۔ یاہ کمین گاہ شکرو کیلر غا جنگلاں ماتہ موجود تھی۔ قابل ذکر ہے جے اس کمین گاہ توں کمبل، صندوق تے کجھ کھان پین غی اشیاء برآمد کی گئی ہیں۔ علاقہ ماتہ تلاشی کا روائی اجاں وی جاری ہے۔ حفاظتی دستاں جموں کشمیر پولیس ہر ممکن کوشش کر رہی ہے جے دہشت گرداں غا ناپاک منصوباں ماتہ ختم کر غے امن امان قائم کیو جائے۔

یہ خبر تم آکاشوائی جموں تیں سُن رہیا ہیں خبراں غا باقی حصہ نال ظفر اقبال۔

Ayushman Health Card

نواں شروع کیا گیا آیوشمان وے وندنہ کا رڈ نے اک سنگ میل حاصل کرتاں واں 70 بہراں تیں اُپر غی عمر آلا بزرگ شہریاں غی 10 لکھ تیں متی غی تعداد غو اندراج کر ليو ہے۔ کا رڈ آلا سینئر شہریاں ماتہ ”آیوشمان بھارت پر دھان منتری جن آروگیہ یوجنا غے تحت مُفت صحت سہولیات میسر آویں۔ صحت تے خاندانی بہبود با رے وزارت غو کہنو ہے جے اسے سال 29 اکتوبر ماتہ وزیر اعظم نریندر مودی غی طرفوں اس کا رڈ غا شروع کرواں غا 3 ہفتاں ماتہ ہی یوہ نمایاں سنگ میل حاصل کیو گیو ہے۔ آیوشمان وے وندنہ کا رڈ غے تحت اندراج شدہ افراد ماتہ تقریباً 4 لکھ خواتین سینئر شہری ہیں۔ اس کارڈ غا شروع ہون تیں بعد اس غے تحت علاج واسطے ہُن توڑی 9 کروڑ روپیہ منظور کیا جا چکا ہیں۔ جن ماتہ 1 ہزار 4 سو خواتین وی شامل ہیں۔ اس کا رڈ غے تحت بہت ساری حالتاں غا اعلاج کیا جائیں تے اس ماتہ اس سال ستمبر مہینہ ماتہ مرکزی کابینہ غی طرفوں منظور کیو گیو تھو۔ جس غو مقصد ساڈہ 4 کروڑ تیں متا کُنباں غا تقریباً 6 کروڑ سینئر شہریاں تک اس غو فائدو پہنچانو ہے۔ واضع رہ جے اس کارڈ غے تحت علاج واسطے کسے آمدن غی حد وی نہیں ہے۔

Jawahar Tunnel

جو ابر ٹنل جہیڑو جے دبائیاں توں وادی کشمیر غو اکلوتو رستو منیو جائے جس غی لمبائی 2.5 کلو میٹر ہے اُس غی مرمت غو کم مکمل ہون غے نیڑے ہے۔ قابل ذکر ہے جے دبائیاں پُرانا اس ٹنل ماتہ سرحدی سڑک تنظیم ہی آر او نے نوی تے جدید طرز ور دوبارہ مرمت کیو ہے۔ 760 بارڈر روڈ ٹاسک فورس غا کمانڈر آمیہ شری واستو نے کہیو ہے جے ٹنل غی مرمت کرن غی لوڑ 2010 توں ہی ضروری ہو گئی تھی جد ٹنل غا دوبارہ پا سے ٹنل غی ٹیوب ماتہ کُجھ منفی مسائل پیدا ہو گیا تھا۔ قابل ذکر ہے جے ٹنل غی مرمت غو کم حفاظتی نگرانی تے سلامتی صورتحال ماتہ دیکھتاں واں کیو گیو ہے۔

جناب آمیا نے مزید جانکاری دیتاں واں دسیو جے ٹنل غی مرمت غو کم گذشتہ سال جولائی مہینہ مانہ شروع کیو گیو تھو جہیڑو جے 18 مہیناں مانہ اک ریکارڈ وقت مانہ مکمل کیو گیو ہے۔ یاد رہ جے اس ٹنل غی مرمت مانہ کل 62 کروڑ 50 لکھ روپیہ خرچ ہوا ہیں۔

Dr Jatinder Machail

مرکزی وزیر ڈاکٹر جتندر سنگھ نے گذشتہ کل کہیو ہے جے جموں کشمیر غا ضلع کشتواڑ غا مچیل گراں نانہ پی ایم سوریا گھر مفت بجلی یو جنا غے تحت شمشئی توانائی واسطے تجویز کیو ہے۔ انہاں نے مزید کہیو جے تحصیل مچیل جہیڑی جے سب ڈویژن پاڈر غی حدود مانہ آوے اس نانہ ضلع ترقیاتی کمشنر راجیش کمار شون سنجیدگی سنگ دیکھ رہیا ہیں۔ جناب جتندر سنگھ نے مزید کہیو جے اس سال 5 ستمبر نانہ اختتام پزیر ہون آلی ماتا مچیل یا ترا جس مانہ آن آلا یا تریاں غی تعداد 2 لکھ 80 ہزار تھی۔

CJ Mini Auditorium

جموں کشمیر و لداخ بائی کورٹ غا چیف جسٹس جسٹس تاشی ریستان جہیڑہ کہ جوڈیشل اکیڈمی غا سرپرست اعلیٰ وی ہیں نے جموں کشمیر جوڈیشل اکیڈمی غی گو رننگ کمیٹی گا چیئر پرسن جسٹس سندھو شرما تے اسے اکیڈمی غی گو رننگ کمیٹی گا ممبران غے ہمراہ اج جانی پور جموں مانہ جموں کشمیر جوڈیشل اکیڈمی مانہ منی آڈو ٹوریم غی تعمیر بارے نی پتھر رکھیو ہے۔ اس اکیڈمی ڈھانچہ غا موزہ منی آڈو ٹوریم مانہ 120 افراد غا بیٹھن غی صلاحیت رہ گی۔ جس غی تعمیر سنگ عدالتی افسراں تے دوجا شراکت داراں غی معیاری تربیت تے صلاحیت مانہ بہتری بارے سہولت مہیا وے گی۔

MeT JK

محکمہ موسمیات نے اج جانکاری دتی ہے جے جموں کشمیر مانہ موسم لگاتار خشک رہ گو جد کہ 24 نومبر نانہ ہلکی بارش تے برفباری ہون غی امید ہے۔ آکاشواںی جموں گا مہارا نمائندہ نے محکمہ موسمیات سرینگر غا دفتر غا حوالہ سنگ خبر ٹوری ہے جے جموں کشمیر مانہ عام طور ور موسم 18 توں 23 نومبر تک خشک رہ گو۔ محکمہ موسمیات نے مزید جانکاری دیتاں واں دسیو ہے جے 25 توں 30 نومبر تک موسم عام طور ور خشک رہ گو تے محکمہ نے سیاحاں تے سفر کرن آلاں نانہ مشور و دتو ہے جے اگلا 5 تہاڑاں مانہ صوبہ جموں تے کشمیر غا کجھ اک مقامات ور درجہ حرارت 1 توں 2 ڈگری ٹہ سکے نالے برفباری ہو سکے۔ تے وے کسی وی خطرہ تیں بچن واسطے محکمہ غی طرفوں جاری رہنما ستور تے ٹریفک ہدایتاں ور عمل کریں۔

اس غے نال ہی خبراں غو یوہ بلیٹن ختم ہوو۔